

Nwàk nè Ba nè PITA à Còm

Pità à còm nwàk nè ba ènə ɲòcèp bə mɔwès sè bùu mok wèŋ sə yə'rə yà' mɔ cos nə sə. Wə à sə dək də Jisòs nə kà mok bwi vè. Yi sə tsok fa wə də Jisòs sə cu mam vɛ'nə bùusè yi ka dzəm də ɲwè nəmòok bisə dzəm, yi sə fa mandzè də ndàaŋwè pwe' bùuŋ gɛsə mɔwè' bɔp awo ɲkuŋ ya yi bwi foho və.

¹ Còm nwàk nè'e mùu Saimù Pità, nè mɔ mo ɲgà fàk Jisòs Krest nə ye sè' ɲgà gè ntum ye. Mù sə còm fa nà' bohòwèŋ bùu sè wèŋ a fa ntum awèŋ bohòyi yà'a. Jisòs Krest nə gùgè bum ye pwe' bə mandzè nè kèkùrè də ya vesùwèŋ fa ntum bohòyi. Nsàp yu nè yi a gù fa wèŋ nə yà' bòkùrə bə sè yi a fa vès sə. Jisòs Krest nə Nwì nə ye sè' ɲgà lùŋsè ves. ² Mù lɛŋ də mɔvè'nè wèŋ sə rì lòTà Jisòs nə ye Nwì fana, Nwìi nə gɔ də bèbo ye bə fifi ye yam ghaha bohòwèŋ anə yamə.

Wèŋ Cum Ncu Nè Co Nà' Niŋ Də Nwì A To Wèŋ Lan

³ Nwì nə a jə ɲàaŋ ye sè ghaŋ sə, nə fa vesùwèŋ bum sè a sə dzəm yà' pwe' ɲgòcu ncu nè bèboŋ, nè co nà' gɔ Nwì kwa. Yi a gù də vesùwèŋ tse' bum yè'sə bə mandzè nè də vès rì ɲwè nè yi a to ves nə. Yi a to ves bùusè yi maŋgəŋgèŋ nə ye sè' bèboŋ. ⁴ Yi a gù vɛ'nə fana ye də yi fa vesùwèŋ bum sè yi ànə kak ves yà', sè yà' tse'

swe' bohòvesùwèŋ wùriŋ sə. Yi à gù ve'nə də ya wèeŋ swirə bup nè nà' cu sənə nzeŋgòŋ nə, nè nà' sə tesə vè bohòbup sè bwì sə dzəm yà' sə, fana nə tse' ɛ nsàp ntəm nè nà'a co nè Nwì.

⁵ Ye də mvè'nə wèŋ a fa ntəm awèŋ bohòJisòs fana yà'a kà fa'nə lè təəŋ. Wèeŋ jihi nzòŋ gəgəŋ, nə yamsə naaŋ gesə bum mok sè bəboŋ mbwa; wèeŋ ye də wèŋ yamsə naaŋ də wèeŋ kà sənə bup nənək gbù ni. Nə yamsə naŋ fe'lə ŋkərè nè ŋgòrì bum sè ma nè Jisòs. ⁶ Anə kà ŋkərè mègù, wèeŋ yamsə naaŋ fe'lə nè ŋgòko ni' awèŋ mbwa sè'. Wèeŋ sə ko ni' fana wèŋ yamsə naŋ gesə kontəm mbwa. Wèeŋ sə ko ntəm, wèŋ yamsə naaŋ fe'lə ŋgògù bum sè yà'a bə mandzə Nwì pwe'. ⁷ Wèeŋ sə gù bum sè yà'a bə mandzə Nwì sə fana wèŋ yamsə naaŋ nè ŋgòjə ndàaŋwè pwe' co moma yo. Wèeŋ sə jə ndàaŋwè pwe' ve'nə fana wèŋ yamsə naaŋ nè ŋgòdzəm bwìŋ mbwa sè'. ⁸ A ye-a ŋga wèŋ sə gù bum yè'sə, nə sə gu ghaha yà' ghaha fana ye də mvè'nə wèŋ a rì Tà àvès Jisòs Krèst sə nə kà wà ye, ncu awèŋ nə nə tse' fàk bəboŋni. ⁹ Bùu sè wo sə kà-a yàwo ve'nə gù fana wo co ŋwè nè yi kà səsap yə gèsəgè, wo co ŋwè nè lis ye à loho laŋ. Wo a swì bisə də Jisòs à cùk fis fa wo bup awo sè wo à gù sə laŋ.

¹⁰ Bwema am wèŋ, bum yè'sə nə yeè nə ve'nə fana mù laŋ weŋ wùriŋ də wèeŋ jihi nzòŋ, nə gu ŋga yà'a niŋtsok də Nwì a to cok fis jəŋ weŋ də ya wèeŋ ye bùu ye wèŋ anə zìnə. Wèeŋ gù-a ve'nə fana wèŋ kà maŋkwèŋ gbù fohòlòyuk. ¹¹ Yà'a mvwe' sè Nwii nə muk fa li weŋ mandzə nè ŋgòkè ni mvwe' gaŋ ŋkum sè Tà àvès Jisòs

Krèst, nè yi sè' ngà lùṅsè vès nè; fana a cum mam mok vesi wèṅ nè mvèsè.

¹² Bum yè'sə nè yeè nè vɛ'nə fana mù dzəm də mɯ sə tsərə fa wɛṅ yà'. Mù rì sè' də wèṅ a rì zìnə nè sè' laṅ, nè sə təəṅ nè bə zɛṅ sè' gɔgɔṅ. ¹³ Megu də nè mù cu tse' ntòfo' bə lis nè'e fana yà' sə bòmɯ yàm də mɯ sə tsərə fa wɛṅ yà' ghà yà lònṅ, ya nga wèṅ ye mali bə zɛṅ cəcɔṅ. ¹⁴ Mù rì də ka mok səsap cum fe'lə ya mɯ fweṅ mak gɛsə ṅgùpni' nè'e fo'. Mù rì vɛ'nə bùúsè Tà àvès Jisòs Krèst a tsè' mɯ vɛ'nə yi jəja. ¹⁵ Mɯ nè jihi nzòn, nè lap noṅsə fa wɛṅ mandzè nè co də a ye-a nga mù kpɯ lòyàm sè laṅ fana wèṅ sə tsərə mali bum yè'sə fo'.

Vès Sə Tsè' Ka Bum Sè Nwè Tsərə Kok Yɛṅ

¹⁶ Vès a tsè' fa wɛṅ mvè'nè Tà àvès Jisòs Krèst ànə tesə və bə ṅàṅ yà'a laṅ. Bum sè vès a tsè' fa wɛṅ yà'sə, ka ncèep cùu sè wà sè bwìṅ a tsərə kok gù yà' bə ṅkərèə yàwo, nè sə cɛp yɛṅ. Yà'a yumok sè vès a yə ṅàaṅ ye sə bə lis avès. ¹⁷ Ghà nè Tà Nwì ànə yamsə yi, nè kùksə yi nè, à ye nga vès sè' fo'. Vès à yuk mvè'nè Nwì nè yi yam càsə ndàaṅwè pwe' yi nè à sə cèp də, <<Nè'e mo àm nè mù dzəm yi, yi gùgè ntùm àm sə kwa wùriṅ.>> ¹⁸ Vès à ye mɯmvwe' nda nè Nwì ànə və mbwa nà'a ves Tà Jisòs wèṅ bəbɛ', nè yuk ṅgì nè mvè'nè nà' sə cèp vèsə mɯbu bə ntu' avès.

¹⁹ Vesùwèṅ rì tse' nga'a mok pap də bum sè ṅgàa tsòhòbum Nwì wèṅ sè ṅjamòk à cèp sə yà'a zìnə bùu bum sè vès a yə yè'sə. Ye də anə boṅ bohòwèṅ wùriṅ nga wèṅ fa-a ṅkərèə awèṅ

bohòncèp ènə, bùusè nà'a co laàm nè nà' sə rɛŋ m̀vwɛ' ndzəndzəm tètè kə dzeŋ ghà nè tsok sə də a rɛŋ. Ghà nè sètsoƚ kok kàmòk fana wèŋ ye rɛɛŋ wes bum sə ntùù wèŋ anə. * ²⁰ Yusè gugun sə a də wèeŋ riŋ də, bum sè ɲgàa tsòhòbum Nwì wèŋ à cèep, nə com ndzənə ɲwàk Nwì sə à ka yumok sè bwì à tsərə kok yà' sə vèə wo bə ɲkərə nè ɲàwo yeŋ. ²¹ Ncèp nè ɲgàa tsòhòbum Nwì wèŋ à cèep nə wo à ka nà' bə ɲaaŋ yàwo cɛp, Yòŋsə Nwì ànə ni sə ntùù wo ɲkuŋ nà' sə gu wo, wo cɛp bum sè yà' sə tesə vè bohòNwì.

2

Jəŋ ɲkərə Bə M̀vwès

Sè Bùu Mok Sə Yə'rə

¹ Anə ye to mantombì fa', bùu sè wo à sə duk də wo sə tsòho bum Nwì ɲga wo sə cì' m̀vwès wèŋ à ye m̀ŋgorè bùu Nwì wèŋ. Yà'a niè' sè' vɛ'nə də bùu sè wo yə'rə fagè bwì m̀vwès wèeŋ nə ye m̀ŋgorè wèŋ sè'. Wo nə wooŋ və, nə sə yə'rə fa bwìŋ yəyərè nè bə jòŋ nè nà'a nə gu bup̄sə bwìŋ. Wo nə dzeen masà àwo nè yi ànə kə tiŋ və tu awo yi nə mwè. Anə kà sàp fana nsàp ɲgə' nè bup̄ nə və mu tuhù wo bùu nsàp yu nè wo sə gu ànə. ² Bwìŋ ɲkùuŋ nə be' mandzè awo nè jì marè'tu nə. Bùu yè'sə wèeŋ nə gu bwì wo sə cèp bum sè bup̄ bə mandzè Nwì nè nà'a zìnə nə. ³ ɲgàa yə'rè fa bwì m̀vwès yè'sə wèeŋ dzəm mègù də wo tse' bum pwe'fo' wo. Fana wo

* **1:19** 1:19 Sètsoƚ nè wo sə to nè'nə, a Jisòs, bùusè ndzənə ɲwàk Bum sè Nwì a Nitsè' Fa Jon 22:16, fana wo to Jisòs sè' bə liŋ yà'sə vɛ'nə.

sə borə kɛ' wɛŋ bə mɔwès də ya wo tse' swe' awo fo'. Nwè nè yi sakgè nzak ànə fəhɯ ye ntinə bùè ŋgòyɛsə wo ŋgə'. Anə kà sàp fana yi mesə wo pwe'fo'.

⁴ Ja'a na yàwèɛŋ yusè Nwì ànə ɣɯ mvè'nè masinjàa Nwì mok wèŋ ànə ɣɯ bɔp yà'a nè. Yi à ka wo wà me'rə. Yi à ko màk gèsə wo mvwe' ŋgə' nè sə misè. Wo nòca bə kwəŋ, ndzəm sə seŋ ca sè' ŋkɛŋ. Wo nə cum mam ca ve'nə tètè kə wes nùmbu sak nzak. ⁵ Bùu sè njamòk sè wo à ɣù bɔp yà'a, yi à ka wo wà sè' me'rə. Yi ànə ɣɯ ndzəp rwiŋ, nə zə wes wo. Bùu sè yi ànə ɣɯ yumok kà wo ɣù sə, à ye mègù Nuà nè yi à sə tsòho fa bwì də wo ɣɯ yusè yà'a bəboŋ. A swirə mègù Nuà nə bə ndap ye, wo à ye bwìŋ sàmba. ⁶ Bùu sè wo à sə cugè mvwe' lak Sodòm bə Gòmora yà'a wèŋ à gbù nzak bohòNwì sè'. Nwì à tè vèpsə lak yà'sə pwe' nè pwe'. Yi à ɣù ve'nə ŋgòni fa bùu sè wo nè kà bohòyi yuk də yi nè kè yeŋsə yà' ŋgə' ntsə'mòk. ⁷ Yi ànə caŋsə gɛsə meɣu Lot yiìyi, nè yi à sə be' ye mandzè nè nà'a zìnə. Lot nə à sə yəgè nsàap bɔp sè lak yà'sə wèŋ à sə ɣùgèə fana ntum sə yaa yi. ⁸ Yi à sə cugè mɔtsətsə'rəə bùu sè bɔp yà'sə wèŋ, nə sə ye bɔp sè wo à sə ɣùu sə nùmbu pwe'. Yi à sə yukgè bum sè bùu sə wèŋ à sə cèep sə sè'. Bɔp sè bùu sə wèŋ à sə ɣùu sə à sə yaan bɔp yi sə ntùu co wù kà fùk, bùusè yi à ye ŋwè nè yi à sə be' ye mandzè nè nà'a kəkərè. ⁹ Bum yè'sə sə nì fa vesùwèŋ də Tà Nwì rì mandzè nè aco yi noŋsə bùu ye wèŋ ya wo swirə ŋgə' nè nà'a nè kè vè nə. Bum yè'sə sə nì fa vesùwèŋ sè' də yi

rì mvè'nè aco yi sə gu ngàa gù bup wèŋ tètè kə wes numbu nè yi nə sak yà'wèŋ, nə yeŋsə wo ngə'. ¹⁰ Bùu sè wo nè yə ngə' ènə nə casə bwiŋ pwe', a nsàap bùu sè wo gù mègù yàwo yusè ntuum awo sə dzəm də wo gu yà'a; nə ye fe'lə bùu sè wo bènŋə ngòyuk bohòbùu sè yà'wèen mantombii wo.

Ngə' Nè Nà' Sə Tə' Bùu Sè Wo Sə Gù Bup

Bùu yà'sə wèen kà yumok wəpgə nə ye sè' gugutu. Wo kà yòŋsəə sè bwiŋ tse' ngòwəp wo yà'a sè' wəp, wo sə yak yà' yàak. ¹¹ A mègù-a sè masinjaa Nwi wèŋ sè wo gu ghak ngàa yə'rè fa bwiŋ mvwès yè'sə, wo kà liŋ yòŋsəə sə mantombii Tà yàkgè. ¹² Bùu yè'sə wèŋ cèpgè yusè bup bə yumok sè wo ka bə zeŋ rɛɛŋ. Wo sə gù bum bə mandzè ləm, co nàam nŋaŋ sè wo kùrə mègù ngòtəm zə wo təmə. A zìnə də mvè'nè wo sə bupsə bùu mok yà'sə, wo nè kə kpə maha ntsə'mòk wà. ¹³ Ngə' nè wo sə fa bwiŋ ànə, Nwii nè làk fəsə wo sè' bə ngə'. Bùu yè'sə wèŋ sə dzəm mègù ngògù yusè ni' awo sə dzəm yà'. Bum sè ndzəmè, wo sə guhu yàwo yà' marəŋ kwan. Nsàp mandzè àwo ànə sə jə vè marè'tu bohòbùu Nwi wèŋ wù kà fùk. Wo zu be'ləgè zuzə wenə wèŋ mvwe' mò'fis, wo sə woon lo mali ngòkè gù bup, nə sə kwa bə zeŋ. ¹⁴ Wo jə mvèk àwo pwe' ngòtsərə mègù bə nza' ko nto, wo gu bup, nə kà wòlok. Wo yə bùu sè wo ka gugun bə bum sè ma nè Nwi yeŋ fana wo borə yà' ngòmè'rə mandzè nè Nwi nə. Wo à ləen yàwo bə nsàp nè ngòtsərə də wo tse' megu

bum pwe' wo nà'a laŋ. Nsàp bù ànə a gbù nzak bohòNwì tè. ¹⁵ Wo a mè'rə mandzè nè rərəŋ nə, nə be' lònə mok nè bə jòn. Wo a be' lòmok mandzè Balàm nè mo Biyònà'a. Balàm nə à ye ŋwè nè yi à sə kwa ŋgògù yusè bup ya yi tse' mbàm fo'. ¹⁶ Anə geŋ Nwì nə jwa sa'rə yi bə bup ye nə. Anə ye də mvomndè' nè yi kà cù cèpgè nè'e à cèp bohòyi co ŋwè sə cèp yi. Yi à cèp ve'nə, nə gu ŋà tsòhòbum Nwì nə yi teŋsə ŋgògù yu ləm yè'sə.

¹⁷ Ngàa mvwèes yè'sə wèŋ mègù co mvwe' sè ndzəp à sə tesəgè fo', nə yum bisə lo. Wo mègù sè' co mbàk nè fəfə kè bwì' samsə nà' ŋga nà' ka mbùŋ ntòli. Nwì a fùhù nòŋsə fa wo mvwe' ŋkəŋkes ndzəm nè wo nè kè cu fo' laŋ. ¹⁸ Wo cèp fomsə bòŋsə ncèep sè wà kè cùhu wo, nə sə lap ŋgòbòrə bùu sè wo sə də wo me'rə mandzè bùu sè wo ka Nwì riŋ sə. Wo sə lap ŋgòbùsə yà'wèŋ ve'nə də ya yà'wèeŋ sə gu megu bum sè yà' sə bònì' awo sə. ¹⁹ Wo sə kak fa bùu yà'sə wèŋ də yà'a nə cum bə tu yà' mvè'nè yà' dzəm, ŋga wo sè wo sə cèp sə cu ŋkwèŋ bohòbup. A ve'nə bùusè yusè yà'a ko kiŋ tse'-a ŋwè lòoŋ, ye də ŋgèŋgàŋ cu ŋkwèŋ bohòyu ànə. ²⁰ A ye-a ŋga bùu sè wo ànə riŋ me Jisòs Krèst nè yi Tà nə ye ŋà lùŋsə vès, nə caŋ tesə sənə bum nzeŋgòn sè aco yà' bupsə ŋwè sə fana nə kə gbù ni ca sèmok; ye də ncu àwo nè maŋkwèŋ nə bup càsə mvè'nè wo à ye to mantombi. ²¹ A ye-a ve'nə ye də ànə boŋ ghak ɛ co wo kà mandzè nè zìnə nə rì yuk, nə noŋsə də wo rì wes yà' làaŋ, nə me'rə fe'lə lùak Nwì sè rərəŋ sə, nə kà yà' mok

bɛ'. ²² Nsàp nè wo gù ànə sə nì də ncèp nè bwiiŋ cèpgè nè nà'a zìnə. Ncèp nè də, <<Ŋgbu lu, nè kə te' zu fe'lə yà' səmok.>> Ncèp mòk ye sè' də, <<Wo cùk fa ŋgùnəŋ ni' də ya yi ye rərəŋ, yi bwi lo, nè kə noon dzərə sənə mwè' səmok.>>

3

Jisòs Nə Və Tsoon Mvè'nə Yi A Kàk Nə

¹ Nge' am wèŋ, nè'e ŋga'a ŋwàk àm nè ba nè mù còm fa wèŋ. Ndzənə ŋwàak am sè ba sə pwe'fo', mù a sə ləp mandzè ŋgòtsərə fa wèŋ bum yè'sə, ya wèŋ riŋ tse' yusè yà'a rərəŋ sə. ² Mù a còm bum yè'sə ya wèŋ sə tsərə ncèep sə ŋgàa tsòhòbum Nwì sè rərəŋ wèŋ à cèp njamòk də yà'a nè kə ye ntsə'mòk sə. Wèŋ sə tsərə tse' lùuk sè Tà Jisòs nè yi sè' ŋgà lùŋsè vès, à tsè' wèŋ cùhu ŋgàa ntum ye sè yi à tum yà' də wo kə tsok wèŋ ŋgògùu yà'a. ³ Yusè mù sə dzəm də wèŋ riŋ to sə də, ghà nè nzeŋgòn nè'e kəp ŋgòmèe fana bwiiŋ nè tesə və sè wo nè sə gù bum mvè'nə bòwo. Bùu yè'sə wèŋ nè sə ywi ncèp nè Nwì nè. ⁴ Wo nè sə duk də, <<Jisòs ànə kak də yi nè bwi və səmok àlaa? Yi nè yeè nè fò? Tè' avès wèŋ à kpə wes lòntinə bùə, bum pwe' cu malì mvè'nə yà' ànə ye to mantombi; yumok nè mò'fis ka kupsə lok.>> ⁵ Bùu sè wo sə cèp vè'nə yè'sə, wo dzəm tsə mègù wo ŋgòbèŋ də Nwì ànə cep bə cù wà fana ntòbu bə nze tesə və. Yi ànə gù nzeŋgòn nè bə ndzəp fana a yà'sə də nzeŋgòn à tesə ndzənə ndzəp. ⁶ Yi à jə sè' ndzəp, nè gù bəpsə nzeŋgòn nè bə zeŋ ghà nè

ndzəp ànə rwiŋ nə, nə ses lok nzeŋgòŋ nə pwe' nà'a. ⁷ Nwii nə sə nòŋsə ntòbu bə nzeŋgòŋ sè yà' cu ŋga'a fo' yè'e sè' bə ncèp ye nə də yà'a nè cu lì ve'nə tètè kə dzeŋ nùmbu nè mis nè tè vəpsə yà' pwe'. Yà'a nè cu fo' tètè kə dzeŋ nè yi nè sak bwìŋ pwe', nə ləsə bùu sè wo à ka mandzè ye bɛ' yà'a wèŋ.

⁸ Nge' am wèŋ, yumòok mò'fis nè wèeŋ kà nà' swì. Yu nə də lùumŋgòŋ ncùhù mò'fis bə nùmbu nè mò'fis mègù bohòTà Nwì pwe'fo' yəyərè, zəzook fo' bùè. ⁹ Bùu mok sə tsərə də Tà sə càsə mvək ŋgwàaŋ wùriŋ, nə kà yusè yi ànə kak də yi nə gù sə gù. Yusə də Nwì sə ko ntum, bùusè yi sə kà də ŋwè nəmòok bisə dzəm. Yi sə dzəm də ndàaŋwè pwe' kupsə, nə bwi fa bup awo ŋkwèŋ. ¹⁰ A ye-a sè ve'nə fana, Tà Jisòs Kræest nè bwì vè ye vèè. Yi nè vè co ŋgà yè vè yi. Mvək ànə ye, bwìŋ yuk ŋga sə cwì ve'ɛ nèbup, fana bum sè yà'a ma mubu nə nom bisə wà. Bum pwe' sə vəp wes, nzeŋgòŋ nə bə bum sè yà' cu ca sə pwe'fo' nə nom bisə wes wà.

Fa Ni' YòBohòNwì Nə Sə Tək

¹¹ Mvəsè vesùwèŋ rì də bum pwe' nè kè nòm bisə ve'nə fana ye də a bəboŋ də a cum ncu nè nà'a ve'ɛ bəboŋ wùriŋ. Wèeŋ nòŋsə fa ni' awèŋ bohòNwì pwe' nè pwe', nə sə yuk yi bə bum pwe' sè'. ¹² Wèeŋ sə kək megu lis bə nùmbu nè Nwii nè vè nə, nə sə lap mandzè ŋgògù sè' gugùŋ co də nùmbu ànə kə dzeŋ nènək. Nà'nə nùmbu nè ntòbu nə sə nom bisə fana bum pwe' sə vəp wes. ¹³ Megu də Nwì a kək vesùwèŋ laŋ də yi nə gù ntòbu nè fi bə nzeŋgòŋ nè fi sè', fana bum nə

megu mok fo' pwe' sè bèbon. Yà'a yusè a sè kùk nga'a zen sè.

¹⁴ Nge' am wèŋ, mvè'nè wèŋ sè tək numbu ànə fana wèŋ lap mandzè gugun co yi kè bwì vèə, yi tseŋ weŋ nga wèŋ ka jòn bohòNwì gu; ya weŋ Nwì wèŋ ye cù mò'fis bə fifi. ¹⁵ Wèŋ jəŋ lɛ də njo nè Tà Jisòs sè kà ntòvè nə, a ngòfa mandzè də ya ndaanwè pwe' tse' lùŋ. Tètà àvès Pol nè vesùwèŋ dzəm yi nà'a còm fagè weŋ, yi sè tsok weŋ sè' vɛ'nə bə ŋkərə nè Nwì a fa yi nə. ¹⁶ Ndzənə ŋwàak ye sè yi còm gè yà' lònŋ, yi sè cep kum bə zen mvmvè'ànə. Yi còm gè bum mok ndzənə ŋwàak ye sè, sè yà' gu ngòrɛŋ yà'. Bùu mok sè ŋkərəə awo ka pap təŋ, nə ye sè' nga wo ka yumok riŋ wèŋ fana wo jəŋ ncèep ye sè, nə sè cwìŋ busə yà' mvè'nè wo cwì būsəgè ncèep mok sè ndzənə ŋwàk Nwì vɛ'nə. Mvè'nè wo sè gù vɛ'nə fana ye də wo sè to naanŋ ngə' mɛ tuhù wo.

¹⁷ Nge' am wèŋ, mvəsè wèŋ rì yàwèŋ bum yè'sə lan fana wèŋ jəŋ ŋkərə də ya bùu sè wo sè kà yàwo mandzè Nwì bɛ' yà'a kà weŋ ma njàwo nè bə jòn sè lò. Ya kà də wo kpes fis weŋ mvwe' yàwèŋ sè bèbon sè wèŋ tə yà'a duk. ¹⁸ Wèŋ gu lɛ nè ngòrì ghaha lòTà àvès Jisòs Krɛst nè yi ngà lùŋsə ves, nə sə guŋ wesə lo mantombi bə bòvəm nje nə. Vesùwèŋ fa yi kèkuksè nə kà teŋsə yuk. Yà'a ye vɛ'nə.

Nwàk Nwì Ma Rùk Nè Fi
New Testament in Yamba

copyright © 2011 Wycliffe Bible Translators, Inc.

Language: (Yamba)

Contributor: Wycliffe Bible Translators, Inc.

All rights reserved.

2020-12-01

PDF generated using Haiola and XeLaTeX on 22 Feb 2024 from source
files dated 29 Jan 2022

c475d5b3-da44-51cf-93ca-f255b72fe481